

Pɔl saba kaplān
Kolosyifa
ye

Syaha fla nge

¹ Ndoo Pɔl kē, ndoo wii Yāhā ra yān yi, ma ra ta Yesu Crise tēnlɛhɛ. Ndoo, ma suhu wo Yesu kāndeyārwe Timuti ne, wii me too saba nwo yrūhū nɔ wāā ye kē, ² yii mpāy tee yii le soho Yesu koho wo Kolosyi wo. Ye ma wo Yesu kāndeyārwai, ma maha n sroŋ le kānde wo. Wo Tuhufua Yāhā, ke ke laantār yar ye na tesē ke yrīn ne.

Syaha tesē wānar ne Kolosyifa wī na

³⁻⁴ Ye sē yāā, tee wo Yīnfua Yesu ta ye Yatɛr mii, tesē mpāy byɛ pe nii Yāhā nawee-, pe ntān pe dye ye tāy mii, wo koo byɛ luhu. Koo kē, yalebyɛ wo ma nii ye wī pāā Yesu Crise Tuhufua Yāhā ye, wo ne syaha wāā ke kē ye wī na. ⁵ Pe le Yesu cīinde kapāyī yar ye na, kayūhū nkāy tee ga waha yāā Yāhā tāy, pe koo byɛ yar ye na ma yee, ye ga waha koho taha yaha ke na. Loo ne, ye n Yesu Crise ta ye Yatɛr, tesē Yāhā nawee- ntān n dye ye tāy. ⁶ Le Yesu kapāyī n cāān driyē kur byɛ wo, nawee- busāā n nii Yesu ta pe Yatɛr. Tee ba le kapāyī fe luhu ye fla na, le sē ba pye la koo syi dyaŋ? Loo na, ye ba Yāhā laantār wī war cīinde. ⁷ Wo tēntēwe Yepafarsyi wii u ntān dye wo tāy, woo kē tuu ye klaha le kapāyī wī ne. U loo pye wo draha wo, u ma Yesu Crise tēnlɛhɛ, u sroŋ. ⁸ U wo yar ma yee, Yāhā Yrā Fānga kāmāy na, Yesu kāndeyārfa ntān dye ye tāy.

⁹ Ma gbe per gii na too ye wī luhu, yalebyɛ wo n pāā Yāhā ne ye wī na. Wo ke nar, ye yai ye naa ke laam wūhū

nkāy pye, ke koo yar ye na. Loo na, ye ga laantor yāã, Yāhā Yrā Fānga kāmāy na, tee maha ke kai- cā. ¹⁰ Wo Yāhā nar ke ye ta, ye n waha naa ye troho tāhā Yīñfua Yesu yor wo, tesē kai- nkāy ke n tāy u ye, ye n waha naa koo pye. Loo na, ye ga naa kayūhū ter byε pye; kaa ga maha naa n taha ye kacān na, Yāhā kuε ye. ¹¹ Wo Yāhā nar ke ye ta ye n waha naa yii plāhā ke fāngayūhū kāmāy na. Loo na, ye ga waha naa wāfāy ter byε sya laanyīn ne, tesē nuhu ne. ¹² Ye ga waha syaha wāã wo Tuhufua Yāhā kē nuhu ne. Ye sē yāã, ke ye ta ye ga waha kayūhū yāã ke cāã- fla wo, kayūhū nkāy ke ta yaha mpāy kē pe ma ke wām.

¹³ Wo Tuhufua Yāhā kē ke wo tyīn sya wam fānga koho wo, ma wo le ke Dyabua Yesu yīnfar yai wo. ¹⁴ Woo kē u wo sya yaha, ma wo kapee- laha kāã wo yīñ na.

Yoo kē Yesu Crise ne?

¹⁵ Yesu Crise ma Yāhā yirfua, wo woo yāã.

Yāhā koo na, waa saha ke yāã ye.

Kai- nkāy byε Yāhā ke tāhā,

Yesu Crise woo u ma ke byε yaha ye.

¹⁶ Woo kāmāy na kai- byε tāhā,

yāhāyīñ na tesē kåntraha ne,

kai- nkāy nawee ga waha ke yāã yīnde ne,

tesē nkāy ne nawee saha ke yāã yīnde ne ye.

U fānga ter byε tāhā, yīnfar ter byε ne,

sāndāã ter byε ne pe fānga ne.

Kai- byε tāhā woo kāmāy na,

ke maha tāhā woo kē.

¹⁷ Kai laa sē bii tāhā wa ye, woo pye.

Woo kāmāy na, kai- byε ma ke wānii na.

¹⁸ Ye cā, yīñ koo kē

ke ma kadye teebεhε byε yaha ye.

Koo syi dyañ Yesu Crise ma

u kãndeyãrfa yawãr byε yĩŋ na.
 Woo kē u ke kai- byε feɡbesaha ta,
 woo kē tuu cãã yir gbã wo,
 ma dur ba yrãŋ na.

Loo ne, u ma yaha ye kai- byε wo.

¹⁹ Le tãŋ Yãhã ye,
 ke n nii ke ya yar woo ya na,
 u n nii Yãhã yirfua.

²⁰ Wãn tii byε te ma kãntraha na,
 yãhãŋ ne, tesē nawee- ter byε ne,
 Yãhã yee koo ga te wãã le
 ke ya ne ke Dya kãmay na.

Loo ne, Yãhã n pa yrĩŋ ne,
 ke Dya ntãŋ kãmay na,
 ntãŋ mpãy pe woo yaliile wo
 pe ba u kuey mar boo trã na.

Yagaa, nawee- ga waha wãã le Yãhã ne.

²¹ Faale wo, ye bya ba dey Yãhã ne, ye sē ba ke cã ye.
 Ye pye gε pye ke napĩ-, ma naa kapee- ga ye laam wo,
 ma naa ke pye. ²² Yagaa, Yãhã ye ta ye n wãã le ke ne ke
 Dya gbã kãmay na, yaliile wo u pye kãntraha na, pe n ba
 u boo. Loo na, Yãhã ta ye ga waha crã ke na, ye laam ne
 pe laha, tee maha sron, kapee laa saa maha pye ye yĩŋ na
 ye. ²³ Koo ngĩ byε ga waha pye, ye ma nii le Yesu kapãŋĩ
 wũhũ sya cĩnde, ye ma waha yii na, ma kuee le Yesu kãnde
 wo, ye ma nii koho taha n yaha le kapãŋĩ kayũhũ na. Loo
 kapãŋĩ nde pãã ye ye, tesē kãntrahafa byε ne, ndoo Pɔl
 ma le tēnlɛɛ.

Pɔl ma Yesu kãndeyãrfa yawãhãfa tēnlɛɛ

²⁴ Yagaa, kadye wãfãŋ gii tē n sya ye wĩ na, n ke sya
 nuhu ne. N cã le ga ba laa yõ ye kē. Koo wãfãŋ nge, u
 Yãhã Yĩndefua Crise ke cãã yar yaha wa, n ga koo wãfãŋ

nge byε sya tãŋ, le n laa yõ Yesu kãndeyãrfa yawãhãfa kē, poo mpãy pe ma mii Yesu kadye dyaŋ. ²⁵ N nii Yesu kãndeyãrfa yawãhãfa tēnlēhε, Yãhã ra taha loo na, ma yee n ke Yãhã kaplãŋ byε pãã tãŋ nawee- ye.

²⁶ Koo kaplãŋ ngĩ, Yãhã sē le yar yãã faalefa na ye, ke le yar yagaafa mpãy na pe ma ke koho wo. ²⁷ Koo kai- ngĩ, waa sē ke war yãã faale wo ye, ke sroŋ yõ. Ye sē yãã, le tãŋ Yãhã ye, ke n yee koo ga ke yar nawee- ter byε na. Koo kē ngĩ: Tee seefar le u Crise ne, ye ga cã ye yee, ye ga ba ye Yãhã nayõr lay yãã. ²⁸ Loo ne, wo u wĩ pãã nawee- ter byε ye, ma pe yar n waha le ne, ma le klaha pe ye laantor busãã ne. Mpãy pe seefar le u Crise ne, wo n kε pe laam pe plãhã u kãnde wo, wo n ba pe yar u na. ²⁹ Ta tēn ne loo ne. N nii waha, ma le tē Yesu Crise fãngangbãŋ kãmay na.

2

¹ N n traha ye cã, n n fãŋ cĩinde wãfãŋ Yãhã wãnar ne ye wĩ na, tesē Yesu kãndeyãrfa byε ne Ladusyε wo, tesē Yesu kãndeyãrfa mpãy byε ne, pe sē ra cã yãã ye. ² N wãfãŋ nge sya ma yee, ye byε laam n wãflaŋ yãã Yesu kãnde wo, tesē ye n seefar le yii ne, ye ntãŋ n dye yii tãŋ. N loo pye ma yee, ye waha laantor yãã, ye Yãhã kaplãŋ cã laha, kaplãŋ nkãy waa sē ke cã yãã ye. Koo kaplãŋ ngĩ u Yãhã Yĩndefua Crise wĩ pãã. ³ Woo kē u Yãhã wũhũ byε cã tãŋ, u maha ma Yãhã laantor ne. U ga waha koo byε yar ye byε na.

⁴ N kai- ngĩ byε yar ye na, ye ma syi waa n ba ye wlaŋ yigi u dawar kaplãntãhã ne ye. ⁵ Ta fla ke sya dey ye ne mii, ta laam poo -sē ma ye ne yalebyε. Tee yii plãhã, ma kuee le Yesu kãnde wo, le tãŋ ra ye nuhu ne.

Yesu Crise woo u ma yĩŋ

⁶ Tee Yesu Crise ta ye Yatɛr, -ye naa n yār u kānde wo, nawee- n le yāŋ cā ye na, ye seefar le u ne. ⁷ Katyigi ke ke nnen gbāā kāntraha na mii, -ye ye laam nnen gbāā Yesu na koo syi! Ye tyii Yesu n yīŋ yāā ye kānkai- byɛ wo! -Ye naa yii plāhā, ye naa n kuee u kur ye. Koo kai- ngī kē pe naa ye klaha. Yāhā ke ke laantār wī lii pye ye kē, ye ma n faha le na ye, -ye naa syaha wāā ke kē!

⁸ -Ye yii yigi, waa ma syi u ye wlaŋ dawar kaplāŋ ne ye! Nawee laam kaplāŋ kē koo ne, yīŋ wee ke na ye, nawee- kapī wūhū kē. U Yāhā Yīndefua Crise wī sē kē koo ngī ne ye. ⁹ Yāhā ke ya wūhū byɛ yar tāŋ gbaa na u Crise kāmāy na. ¹⁰ Tee seefar le u ne, ye Yāhā wūhū byɛ yāā tāŋ. Ye sē yāā, woo ma fāŋga ter byɛ yīŋ na, yīnfā ter byɛ ne.

¹¹ Tee seefar le u ne, ye nii mii ye kūū. Koo yīntaha kē Yesu Crise ye yi kāā kapee- wāpyeŋ wo. Koo kē Crise wākūū, naweete wākūū sē kē ye. ¹² Ye sē yāā, tee tāā yi loho wo, ye le sya ma cā Yāhā fāŋga kē ke Yesu Crise ta u n yir gbā wo, ma dur ba yrāŋ na gbaafa ye. Ye wātāāyi yīntaha kē nde: Le ma mii, ye bya ba wāā le u ne gbī laam wo nakur, Yāhā n ye ta ye n yir gbā wo, ma dur ba yrāŋ na gbaafa ye.

¹³ Faale wo, ye pye nakur draha wo Yāhā ye, ye kapee- wāpye wī na. Ye sē ba cīinde Yāhā cā ye, ye sē maha ba kūū Crise wākūū ter na ye, koo kē. Yagaa -sē na, Yāhā ye ta ye n yir poo gbā wo, ma dur ba yrāŋ na woo kāmāy na, ma ye kapee- byɛ laha kāā ye yīŋ na. ¹⁴ Le nii mii saba dyaŋ le yrūhū le na ma yee, Yāhā fuɛ ma wo na wo kapee- wāpye wī na. Yāhā n woo saba wī kua kāā wo yīŋ na, yaliile wo Yesu Crise ku wo wī na trā na. ¹⁵ Yāhā u gbā ta, ma sāndāpee ter byɛ fāŋga pye klaha- tāŋ, pe yīnfā ne. Ke yia pe fāŋga na nawee- byɛ yīnde na Crise gbā kāmāy

na. Ke syi u nii yiafua fānga ter byε na.

¹⁶ Loo na, ye ma syi ye naa waa kapān luhu ye dir wīi na, tesē wān tii ne tee n wɔ ye. Ye ma syi ye naa waa kapān luhu kapīi- nkāy wīi na, tee yai ye pye gbargbar per syi wo, yronfuē yīmper ne, tesē kani per ne ye. ¹⁷ Koo kai- ngīi ma mii u Yāhā Yīndefua Crise kayūhū yīm ya dyaŋ. Yīm ya wee kla ye, Crise woo gε kē tuu ga waha u kayūhū wāa ye kē.

¹⁸ Ye ma syi ye naa kawarfuafa kaplāŋ luhu ye Yesu kānde wāyār wīi na ye. Ye ma syi ye yii tege tāa ye, ye naa yāhāyīŋ tēnlēhε sey poosyifa wāŋ syi dyaŋ ye. Poo ma yāa mii wāytāa dyaŋ pe na, ma ngaa yāa, pe ga le ta kangbāy pe laam wo. Yīŋ wee ke na ye, yataŋ gboho tεr pe na, naweeteē kacān ter ya te ma pe laam wo. ¹⁹ Pe sē Yīŋfua Yesu wīi klaha nawee- ye ye. Woo -sē kē u n ta, u kāndeyārfa yawāhāfa n gaha yahasee ye, loo le n tāy Yāhā ye. Le ma mii yīŋ wāŋ syi dyaŋ, ke ma kadye teebēhε kur byε yaha ye, ke kadye n nii n lε. Ke kadye teebēhε byε gbra te ya na, sohosar fla na, tesē nnen ne.

²⁰ Nawee ma ku, u yīŋ yi kāa kapīi- wūhū wo. Tee -sē nii mii ye ku u Crise ne, le ma mii ye yi kāa kapīi- wūhū wāfāy wo. Nwa ye n maha yii le yaha kapīi- wūhū kānde wo?

²¹ Pe ma ye pye ma yee, ye ma digi nge di, kapīi ne; ye ma digi nge ter pye di yāŋ wāpyediyāŋ ya, kapīi ne; ye ma tε kla nge na, kapīi ne; nwa ye n nii ke sya cīinde? ²² Nawee- kaklaha ya kē koo ne. Yīŋ wee ke na ye, ke ga ba kua kāa. ²³ Koo kapīi- wūhū pyefa, pe pe ya ta poo ma kacāŋ-, pe sē -sē wee ngaa gε ye. Pe pe kai- pye pe ya koho fānga na ma yee, poo pe ya tege tāa ye. Pe pe ya kadye ka n fāy, pe koo ngīi byε pye pe yataŋ kānde na.

3

-Ye naa Yāhā wūhū ke, koo ke ma yīŋ!

¹ Tee nii mii ye yir gbā wo, ma dur ba yrāŋ na gbaafa ye u Yāhā Yīndefua Crise ne, ye yai ye naa yāhāyīŋ wūhū koo ke. Koo fla na, Yāhā u Crise ta u n nii ke kāndigi kuε ye kai- byε yīŋ na. ² Ye ma syi ye kāntraha wūhū ta yahasee ye ye, -ye Yāhā wūhū koo ta yahasee ye! ³ Ye sē yāā, le ma mii ye wee driyē nge laam wo nantāŋ ye, ye n poho Crise ne Yāhā fla na, nawee- saha loo yāā yīnde ne ye. ⁴ Yagaa, tee n poho Crise ne Yāhā tāy, per gii Yāhā ma ba u ta u n dur ba kāntraha na nawee- byε yīnde na, woo wii too n poho u ne, wo byε ga ba wāā nii u ne kai- byε yīŋ na u nayōr fla wo.

Kolosyifa faale wūhū, pe yagaa wūhū ne

⁵ Nawee ma ku, u yi kāā kapee- wāpyeŋ wo. Tee -sē nii mii ye ku Yesu Crise ne, ye tyii ye kapee- wāpyeŋ na mii tyatyāhā ter byε dyaŋ, tesē katār rii byε ne te sē yō ye, ma suhu yīnde wān byε wāke ne, tesē koho wāwahatεr ne wale kuε ye. U wale ga nii u ye mpar wāŋ dyaŋ. ⁶ Mpāy pe kapee- ngī pye, Yāhā laam ga ba war pe ne, ke n pe pēn. ⁷ Faale wo, tee pye kapee- koho wo, ye naa koo kapee- ngī pye.

⁸ Yagaa, ye tyii kapee- ngī wāpyeŋ na mii laam wāwar dyaŋ, ncafūhū wādiŋ ne, tesē napeer ne. Ye ma syi tyεhε n naa n yi ye yē wo, tyatyāhā kaplāŋ ne ye! ⁹ Ye ma syi ye kawar fua naa n taha yii na ye! Ye sē yāā, ye ye faale kapee- wāpyeŋ miy yaha, ¹⁰ ma klaha nii nafām. Ye ga naa n nii koo syi ya, ye sya ba nii mii Yāhā wāŋ syi dyaŋ, Yāhā gii ke nawee tāhā. Ke syi, ye ga ke cā cīnde.

¹¹ Ye ma Yāhā cā cīnde, loo le ma yīŋ. Ma -sē yee, ye ma Yiiffee- woo, ye wee Yiiffee- woo, ye kūū woo, ye sē kūū woo, ye ma yāmpa woo, ye wee yāmpa woo, le tāy ye ma

kulaafa woo, ye ma nyĔfigifa woo, yīŋ wee koo katε- ngī wī nen laa na ye. U Yāhā Yīndefua Crise woo u ma yīŋ kai- byε wo, ye byε n poho woo kāmāy na.

¹² Ye ma Yāhā wām. Ye ntāŋ dye Yāhā tāy, ke n ye yāŋ yi, ye nii ke wām. Loo nde na, ye yai ye naa koho le yii ye, -ye naa laantār yar yii na, -ye naa yii tege tāā ye, -ye ta ye wī naa n tāy nawee- ye, -ye naa nii laanyīn ya ne! ¹³ -Ye naa n nii pra yii ne, ye nampyeŋ wii ma laa tee pye ye na, ye yai ye tyii le kapee fuε na ye kuāŋ ne. Ye yai ye naa n tyii ye kapee- foho na yii kē, mii Crise tyii ye kapee- foho na u kuāŋ ne mii. ¹⁴ Lii le ma yīŋ, ye tyii ye ntāŋ n dye yii tāy, loo ga ye ta ye n sroŋ wāā le.

¹⁵ Crise tuu yrīŋ mpāy wāā ye kē, ye tyii poo wī n naa n nii ye laam wo, -ye n naa ye troho tāhā loo kānde na yalebyε! Ye ma nii koo syi, ye byε ga naa n nii yīmbui nen na, yii mpāy tee ma Yesu kāndeyārfa. -Ye naa syaha wāā Yāhā kē kai- byε na! ¹⁶ Ye tyii u Crise kapān n nii gbāā ye laam wo, le cīnde wūhū byε ne. Loo na, ye yai ye laantor yāā, -ye naa yii klaha le Crise kapān ne, -tee naa yii laam too kai- na! -Ye naa syaha wāā Yāhā kē, -ye naa yay le nuhu ne ke kē! -Ye naa koo ngī pye Yāhā wāsey yay ne, tesē Yesu kāndeyārfa yay taa ne, ma suhu yay taa ne tii Yāhā te le ye laam wo.

¹⁷ Kaplāŋ nkāy byε tee ga naa n pāā, -ye naa ke pāā Yīŋfua Yesu miyūhū n yi le na. Tesē, kai- nkāy byε tee ga naa n pye, -ye naa ke pye u miyūhū n yi le na! Yāhā ke ke laantār wī lii pye ye kē, ye ma n faha le na ye, -ye naa syaha wāā ke kē Yīŋfua Yesu kāmāy na!

Yesu kāndeyārfa pe nampyeŋ- ne

¹⁸ CƆƆ, yīnfar wāā ma puai kē, taa naa n luhu u ye! Loo ne le sroŋ Yesu kānde na. ¹⁹ Puai, tyii ma CƆƆ ntāŋ n dye ma tāy, ma'a syi ma ma laam waha tεr u ne ye.

²⁰ Kicar, -ye naa n luhu ye seefa ye kai- byε wo! Loo ne le yõ Yesu kãnde na. ²¹ Seefa, ye ma syi ye laam n waha tεr ye pii ne ye! Mii loo sē ne ye, pe ga waha yee, pe wīi sē n tãy ye ye ye.

²² Tēntē-, -ye naa n luhu ye yīnfa ye kai- byε wo, kãntraha nge na. Pe yīnde ma ye na woo, pe yīnde wee ye na ye woo, -ye naa pe wīi pye yalebyε! Ye ma syi ye yee, ye ga naa pe wīi pye, ye wīi n tãy pe ye loo wīi na ye. Tee n kε ye wīi n naa n tãy Yīnfua Yesu ye, -ye naa ye yīnfa wīi pye laanyõm ne. ²³ Le ma pye tēn lii tēn lii, -ye le tē yõ nuhu ne! Ye sē yãã, ye le tē Yīnfua Yesu kē, ye sē le tē naweete kē ye. ²⁴ -Ye ye laam too nde na: Yãhã kayũhũ nkãy ta yaha ke nawee- kē, Yīnfua Yesu Crise ga ba ye dãã ke ne. Ye sē yãã, ye tēn tē woo kē. ²⁵ Wii tuu -sē kapee-pye, Yãhã ga ba u pēn u kapee- wīi na. Yãhã -sē nge, le tãy ma ma nangbãñ woo, ma ma nafla woo, nawee- byε ma wãcεñ ke yahasee ye.

4

¹ Yii mpãy tee ma yīnfa, -ye naa n sronj ye tēntē- ne, -ye pe yigi naa n yõ! -Ye ye laam too nde na: Ye bya, ye Yīnfua ma yãhãyīñ na, wii tee yai ye naa n luhu u ye.

Pɔl Kolosyifa yar kai- ne

² -Ye naa n pãã Yãhã ne yalebyε! Ye ma syi ye naa n faha loo ne ye! -Ye naa syaha wãã Yãhã kē, ke laantãr wũhũ nkãy wīi na ke n pye ye kē. ³ -Ye naa Yãhã nar ta bya wīi na, ta n waha nii yãã, n naa u Yãhã Yīndefua Crise cīinde wīi yar nawee- na, cīinde wīi lii pe sē le cã yãã ye. Ye sē yãã, loo cīinde nde wīi ne tē ma nwompihi wo. ⁴ N taha loo cīinde nde wãpãã na. -Ye Yãhã nar ta n waha le pãã laha nawee- ye.

⁵ Mpāy pe wee Yesu kāndeyārfa ye, -ye naa ye troho tãhã pe ne laantor ne. Ye ma kãhã yãã tee ga waha Yesu wĩĩ pãã pe ye, -ye naa le pye. ⁶ -Ye naa kaplāyũhũ pãã pe ne, laantor ne! Wii ma ye yey lii ne, -ye ufua klaha cĩĩnde ne!

U saba kuasaha fla, syaha ne

⁷ Kai- nkāy ke ma ra wũhũ, Tesyihi wii u ma wo Yesu kãndeyārweɓua, u n gaha naa ke tōr ye ye. U ma ra tēntēwe Yesu tēn na; u koho le ra ye. ⁸ N u lēhē wãã ye ye, u ga wo wũhũ pãã ye ye, tuu ye ta ye n waha laanyĩn yãã. ⁹ Pe ma pe syām ye klofua Wonasyimu ne. U bya ma wo Yesu kãndeyārweɓua, u sroŋ le kãnde wo. Poo pe syām, pe n gaha ye yar kai- nkāy bye ne, ke n pye wo fla na nwo.

¹⁰ Arisarkē wii u ma nwompihi wo ra ne, u ye syar, woo tesē Barnabaase cĩĩfua Marēkē ne. N ba u Marēkē wĩĩ cãã pãã wa ye ye. U ma ba ka ye fla na, -ye u yigi yō! ¹¹ Yesu wii pe n yee Yituse, u bya ye syar. Poo naam tãã mii ya me pe ma Yiifee-, ma Yesu kãnde yār, ma nii tēn tē ra ne Yãhã Yai myaha na. Pe wĩĩ nuhu le ra laam wo, ma maha ra laam yĩn.

¹² Yepafarsyi wii u bya n yi ye klo wo, u bya ye syar. U ma Yesu Crise tēntēle. Yalebye u Yãhã nar ye wĩĩ na cĩĩnde wānar, ma yee ke wãle laantor wãã ye kē Yãhã wũhũ kuē ye, ye n ke laam wũhũ cã, ye naa ke pye. ¹³ -Ye yãŋ, n cã ye wĩĩ sroŋ gboho Yepafarsyi laam wo cĩĩnde, yii Kolosyifa, tesē Ladusyefa bya ne, tesē YErapsyifa ne. ¹⁴ Wo naambiyãɓua Luke wii u ma dohotar, woo tesē DEmasu ne, pe ye syar. ¹⁵ -Ye Ladusyē Yesu kãndeyārfa syar, -ye Nēhēfaa syar, woo tesē Yesu kãndeyārfa mpāy ne, pe pe ya wãã u kaha wo. ¹⁶ Ye ma ba saba nwo kal tãŋ wa ye yawãhãfa bye ye, ye ta pe n u kal Ladusyē Yesu kãndeyārfa yawãhãfa bya ye. Saba wii tē -sē yrũhũ wãã

Ladusyεfa ye, pe ma u nɔ wãã ye kě, -ye u kal yii ndonj!
¹⁷ -Ye Arisyipe yar, pe u taha Yĩnfua Yesu tẽn lii na, u le
tẽn yõ!

¹⁸ Kaplãŋ nkãy ke ga taha yagaa, ndoo gε kě tẽn ke
yrũhũ ta koho ne: Ndoɔ Pɔl, n ye syar. N ma nwompihi
wo, ye ma n faha le ne ye. Yãhã ke ke laantãr wũhũ pye ye
byε kě.

YĀHĀ NAAMBIYĀRFĀN SABA

Karaboro, Eastern: YĀHĀ NAAMBIYĀRFĀN SABA New Testament
copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 13 Jun
2022

15120496-00e2-503a-8d40-2d7cfc1ba5b